

Uunga

allannguutissatut siunnersuut

**Uunga siunnersuut: Kalaallit Nunaata Aatsitassarsiornermi
Aningaasaateqarfia pillugu Inatsisartut Inatsisissaattut siunnersuut**

Pingajussaaneerinissamut Aningaasaqarnermut Ataatsimiititaliamit saqqummiunneqartoq.

§ 6-imut

1. Imm. 4 ima oqaasertalerneqarpoq:

"Imm. 4. Namminersornerusut aatsitassarsiornermik sammisanut aningaasaliissutaat, aatsitassarsiornermik sammisanut aningaasartuutaat kiisalu suliaasat tiguneqartut isumaginerannut aningaasartuutit ukiumi aningaasaliiffiusumi inatsisartut aningaasanut inatsisaanni imaluunniit ilassutitut aningaasaliissutini missingersuusiorneqarsimasunit ikinneruppata, aningaasat nikingassutaasut amerlaqataat landskarsimit aningaasaateqarfimmut nuunneqassapput."

2. Imm. 4-ip kingorna immikkoortutut nutaatut ilanngunneqarpoq:

"Imm. 5. Landskarsip aningaasaateqarfiullu akornanni aningaasanik imm. 4 malillugu nuussineq siulersuisut aamma Naalakkersuisut isumaqatigiinnerisigut pissaaq, taamaattorli ukiumi aningaasaliiffiusumi landskarsip naatsorsuutaasa akuersissutigineqareernerini qaammatinit 6-init kingusinnerusumi pisinnaanani."

3. Imm. 5-ip nutaap kingorna immikkoortutut nutaatut ilanngunneqarpoq:

"Imm. 6. Landskarsip aamma aningaasaateqarfiup akornanni aningaasanik nuussineq, Namminersornerullutik Oqartussat missingersuusiortarnerat pillugu inatsit aamma Inatsisartut Aningaasanut inatsisaat mianeralugit aatsaat pisinnaavoq."

§ 12-imut

4. Imm. 1-imi "Siulittaasoq, siulittaasup tullia aamma ilaasortaq ataaseq Kalaallit Nunaanni Danmarkimiluunniit najugaqartuussapput" atorunnaarput.

§ 22-imut

5. Imm. 2-ip kingorna immikkoortutut nutaatut ilanngunneqarpoq:

"Imm. 3. Siulersuisut suleriaasertik, aningaasaateqarfiup pisariaqartitaanut naleqquttuaannarnissaa aammalu ingerlatseqatigiiffinnik aqutsilluarnissamut akuerisaasumut naapertuuttuaannarnissaa qulakkeerniarlugu, ukiumut ataasiarlutik misissortassavaat. Suleriaasissami siulersuisuni siulittaasup suliassaanut sulinissamik suliassanullu nassuiaat aammalu qullersaasut siulersuisunut nalunaarusiortarnissaannut suleriaasissat allassimassapput".

6. Imm. 3-ip nutaap kingorna immikkoortutut nutaatut ilanngunneqarpoq:

"Imm. 4. Siulersuisut qaammatit pingasukkaarlugit nalunaarutinik, paasissutissanik aningaasaateqarfiup ingerlanneqarneranut ineriartorneranullu pingaaruteqarsinnaasunik imaqartunik tamanut saqqummiussisassapput.".

§ 23-imut

7. § 23, imm. 2 ima oqaasertalerneqarpoq:

"Imm. 2. Pisortaq siulersuisunit atorfinitsinneqassaaq soraarsinneqassallunilu siulersuisunut siulittaasup allakkatigit tunngavilersukkamik inassuteqarneratigit. Pisortassatut taamaallaat inassutigineqarsinnaapput inuit akileraartarnermut inatsimmik sakkortunerusumik unioqqutitsisimasutut eqqartuunneqarsimanngitsut imaluunniit aningaasanik pinerluuteqarneq nakuusernerluunniit pillugit pinerluttulerinermik inatsimmi aalajangersakkanik unioqqutitsinermut eqqartuunneqarsimanngitsut. Kiisalu inuit minnerpaamik siulersuisunut qaffasissuserititanut nallersuuttumik qaffasissusilimmik suliatigit piginnaaneqarluartutut uppersaaserneqarsinnaasut kisimik inassutigineqarsinnaapput, tak. § 11, imm.1.

Allattoqarfiup sulisuinik atorfinitsitsineq soraarsitsinerlu pisortap isumagisussaavaa."

§ 28-imut

8. Imm. 1-imi oqaaseqatigiinni siullerni "Naalackersuisut" allanggortinneqarput "Siulersuisut"-nut.

9. Imm. 4-p kingorna immikkoortutut nutaatut ilanngunneqarpoq:

"Imm. 5. Aqutsisut aningaasaateqarfiup isertitaasa aningaasartuutaasalu ineriartornerat pillugu nalunaarusianik qaammatit pingasukkaarlugit aningaasaateqarfiup siulersuisuinut Naalackersuisunullu nassiussisassapput."

10. Imm. 5-ip nutaap kingorna immikkoortutut nutaatut ilanngunneqarpoq:

"Imm. 6. Aqutsisut qaammatit pingasukkaartumik ukiukkaartumillu nalunaarusiaat suliffeqarfimmut aningaasaqarnermik misissueqqissaarinermik immikkut ilisimasalimmut arlaannaannulluunniit attuumassuteqanngitsumut akuerisaasumullu aammalu Naalackersuisunit toqqarneqarsimasumut nalilerneqartussanngorlugit nassiunneqassapput. Tassani nalilerneqassaaq aningaasaateqarfiup

anigaasaliinerinit iluanaarutit uuttuummut aalajangersimasumut sanilliullugit naammaginaruunersut. Taamatuttaaq nalilernerqassaaq anigaasaateqarfiup anigaasaliineri ileqqorissaarnikkut illersorneqarsinnaasumik tunngaveqarluni pisarnersut. Suliffeqarfiup arlaannaannulluunniit attuumassuteqanngitsup naliliineri anigaasaateqarfiup siulersuisuinut Naalakkersuisunullu nassiunneqassapput, tamatumalu peqatigisaanik tamanut saqqummiunneqassallutik."

§ 33-imut

11. § 33, *imm. 1* ima oqaasertalerneqarpoq:

"*Imm. 1.* Anigaasaateqarfiup naatsorsuutai kukkunersuiusumit landskarsip naatsorsuutaanik kukkunersuiusuumit aammalu kukkunersuiusumit naalagaaffimmit akuerineqartumit siulersuisunit toqqarneqartumit kukkunersiorneqassapput."

§ 39-imut

12. § 39, *imm. 1*, imatut oqaasertalerneqarpoq:

"*Imm. 1.* Siulersuisut ukiumoortumik anigaasaateqarfiup sulinera pillugu nalunaaruteqartassapput. Nalunaarut nunani tamalaani pitsaassusissatut akuerisaasut malillugit suliarineqartassaaq aammalu anigaasaateqarfik pillugu pissutsit pingaaruteqartut tamaasa pillugit paasissutissanik piffissamik eqquisunik erseqqissunillu tamanut ammasumik paasissutissiinissamik qulakkeerissalluni, ilanngullugit anigaasaateqarfiup anigaasaqarnikkut inissisimanagera, angusai aqunneqarneralu. Paasissutissani ilaatinneqassapput suleriaatsinut nassuiaatit aammalu siulersuisunut ilaasortanik ataasiakkaanik toqqaanermi tunngavissatut atorineqartut kiisalu siulersuisut qullersallu anigaasarsiaqartinneqarneri aammalu soraanermut atatillugu aqqissuussinerit pillugit paasissutissat. Aammalu allassimassaaq siulersuisunut ilaasortat ataasiakkaat piginnaasanik immikkut ittunik sorlernik anigaasaateqarfimmut tunniussinersut. Kiisalu nalunaarusiami allassimassaaq siulersuisunut ilaasortanik siulersuisullu siulittaasuannik nammineq naliliisarneq aammalu avataaneersumik immikkut ilisimasalimmik naliliisitsisarneq siulersuit sulinerannut atuutsinneqarnerisooq. "

13. § 39, *imm. 2*, imatut oqaasertalerneqarpoq:

"*Imm. 2.* Naalakkersuisut siulersuisunik tusarniaareernerimikkut nalunaarusiap imarisassai pillugit maleruagassanik erseqqinnerusunik aalajangersaasinnaapput. "

9. *Imm. 2*-ip kingorna immikkoortutut nutaatut ilanngunneqarpoq:

"*Imm. 3.* Anigaasaateqarfiup ukiumoortumik naatsorsuutaasa nalunaarutaalu Naalakkersuisunut saqqummiunneqarneranut peqatigitillugu Inatsisartut Anigaasaqarnermut Ataatsimiititaliaanut aamma Inatsisartut Kukkunersuiunermut Ataatsimiititaliaanut nassiunneqarnissaa siulersuisut isumagissavaat. Anigaasaateqarfiup ukiumoortumik naatsorsuutai nalunaarutaalu Naalakkersuisunut nassiunneqarnerannit ullut 14-it qaangiunneranni tamanut saqqummiunneqassapput. "

Nassuiaatit

Nr. 1-imut, 2-mut aamma 3-mut.

Aningaasaateqarfiup pigisai pappiaqqanut nalilinnut inissineqassapput. Aningaasanik tigoraaannarnik pisariaqartunik nunap karsianut aningaasaqarnikkut naleqqunnerpaamik nuussinissamut atugassaqaqarnissaq qularnaarniarlugu § 6, imm. 5-imi aalajangersakkakkut siunnersuutigineqarpoq, aningaasaateqarfimmit nunap karsianut aningaasanik nuussinissamut piffissaq siulersuisut aamma Naalakkersuisut tamanna pillugu isumaqatigiissuteqarnerisigut pisassasoq, taamaattorli ukiumut aningaasaliiffiusumut Nunap Karsiata naatsorsuutaasa akuersissutigineqarnerinit qaammatinut 6-iniit kingusinnerusumi pisinnaani.

Aningaasaqarnermut ataatsimiisitaliap aappassarinissamut isumaliutitsiissutaani erseqqissarneqarpoq aatsitassarsiornermut aningaasaliinermut imaluunniit suliaasaqarfinnik nutaanik tigusernermut atatillugu atuinerussutaasunut matusissutissatut nunap karsianut nuussineq, missingersuusiornermut inatsimmi aningaasanut inatsimmi aningaasaliissutinik imaluunniit ilassutit aningaasaliissutit Inatsisartut aningaasaqarnermut ataatsimiisitaliaanniit akuerineqarsimasunit sippuinninnissamik inerteqquteqarnermut akerliussanngitsaq erseqqissarneqartariaqartoq. Siunnersuutigineqarpoq § 6 imm. 6-imi aalajangersakkakkut Kalaallit Nunaata Aatsitassarsiornermi Aningaasaateqarfia pillugu Inatsisartut Inatsisissaattut siunnersuummi erseqqissarneqassasoq, missingersuusiornermut inatsit pisuni tamaginni mianerineqartassasoq. Tamanna paasineqassaaq aningaasaliinissamut maleruagassat atuuttut malillugit ilassutit aningaasaliissuteqarnissamik akuersissuteqartoqarsimatillugu aatsaat, nunap karsiata aamma aningaasaateqarfiup akornanni atuinerussutinik atuinikinnerussutinilluunniit nalimmassaasoqarsinnaasoq.

Nr. 4-imut

Allannguutissatut siunnersuutigineqartukkut Kalaallit Nunaanni Danmarkimilu kisimi pinnani nunarsuarmili tamarmi najugalinnik siulersuisunut ilaasortassarsiortoqarsinnaavoq. Taamaalilluni siulersuisunut ilaasortassarsiornermi tunngavissaq siamasinnerusaq qulakkeerneqassaaq.

Nr. 7-imut

Allannguutissatut siunnersuutigineqartukkut qulakkeerneqassaaq aningaasaateqarfiup pisortaa siulersuisut piginnaasaasa assinginik suliatigut pisariaqartunik piginnaasaqarnissaa. Aammattaaq qulakkeerneqassaaq piumasqaatinik ataqqinassutsimut tunngasunik pisortap eqquutsitsinissaa, tamannalu aningaasaateqarfiup nalinginnaasumik ingerlatsinerata patajaatsuuneranik

pimoorunneqarneranillu oqariartuuteqarnissaq eqqarsaatigalugu pisariaqartinneqarpoq.

Nr. 5-imut, 6-imut, 9-mut, 10-mut, 12-imut aamma 13-imut.

Aningaasaqarnermut ataatsimiisitaliap aappassaarinissamut isumaliutitsiissutaani "ingerlatseqatigiiffinnik aqutsilluarnissamik kaammattuutit" innersuussutigineqarput. Aningaasaqarnermut Ataatsimiititaliaq isumaqarpoq kaammattuutit taakkua inatsisissatut siunnersuummi, ilaatigut siulersuisut suleriaasissaata imarisassaannut piomasaaqatinik aalajangersaanikkut ersarinnerutinneqartariaqartut, ilanngullugit siulersuisunut ilaasortanik toqqaanermi tunngaviusussat aamma aningaasaateqarfimmi pissutsinut tunngatillugu ammanerunissamik piomasaaqatit, ilanngullugit siulersuisunut qullersanullu aningaasarsiaqartitsineq.

Kalaallit Nunaata Aatsitassarsiornermi Aningaasaateqarfia pillugu Inatsisartut Inatsisissaattut siunnersuummi § 22-p, § 28-p aamma § 39-p oqaasertalersornerisa allangortinneqarnissaannut siunnersuutitigut, inatsisissatut siunnersuummi siulersuisut katitigaanerat suliassaallu pillugit, ukiumoortumik nalunaarummi paasissutissiissutigineqartussatut piomasaaqatit aamma aningaasaateqarfimmi pissutsit pillugit qaammatit pingasukkaarlugit nalunaarutinik tamanut saqqummiussisarnissaq pillugu aammalu naalakkersuinikkut akisussaaffeqartut annertunerusumik paasisaqarsinnaanissaat pillugu aalajangersakkat, ingerlatseqatigiiffinnik aqutsilluarnissamik kaammattuutinut tunngaviusunut oqaatigineqartunut naleqqussarneqarput.

Nr.8-imut

Kalaallit Nunaata Aatsitassarsiornermi Aningaasaateqarfia pillugu Inatsisartut Inatsisissaattut siunnersuummi § 28 imm. 1-imi "Naalakkersuisut" uunga "Siulersuisut" allangortinneqarpoq. Siunnersuummi allannermi kukkusoqarsimavoq aammalu oqaatsimi siunnersuutigineqartumi aalajangersakkap imarisaa ingerlatseqatigiiffinnut inatsit malillugu siulersuisut nalinginnaasumik akisussaaffinnik suliassaminnillu isumaginninnissaannut naapertuuttunngortinneqarpoq. Siulersuisunik toqqaanermi qularnaarneqartussaq tassarpiaavoq, ilaatigut aningaasaateqarfiup pigisaannik aqutsisussanik piginnaassuseqarnerpaanik toqqaasinnaanissamut, ilaasortat naleqquttumik pisariaqartumillu ilisimasaqarlutillu misilittagaqassasut.

Nr.11-mut

Aalajangersakkamut oqaasertaliunneqaqqaartoq ima kukkusumik paasineqarsinnaavoq; kukkunersiuisoq landskarsip naatsorsuutaanik kukkunersiuisuusoq kukkunersiuisumik aningaasaateqarfiup naatsorsuutaanik kukkunersiuisussamik toqqaanermi peqataassasoq. Taamaattoqartussaannngilarli.

Allanngutissat siunnersuutigineqartukut oqaatsit ersarinnginnerat tamanna iluarsineqarpoq.